



LINTLHA TSA PUO EA MOHLOMPHEHI LETONA LA
MESEBETSI EA SECHABA 'MOKENG OA BAPHATLALATSI
BA LITABA

MOKO-TABA: KHAHO EA LIMOTO-MOTO NAHA KA
BOPHARA

Sebaka: Ntlo-kholo ea Lekala la Mesebetsi ea Sechaba

Letsatsi: La 14 Motšeanong 2021

Thomo ea Lekala

Lekala la Mesebetsi ea Sechaba le filoe boikarabelo ba ho etsa meralo, khaho le tokiso ea litsela le marokho ka Setsi sa lona sa Litsela (Roads Directorate). Le boetse le filoe boikarabelo ba ho rala, ho aha le tokiso ea meaho ea 'Muso ka Lefapha la Building Design Services.

Ha re tla moralong oa 'Muso oa Ntlatfatso, NSDP II, Lekala la h'eso, ke le leng la Makala a shebetsoeng ho batalatsa mabala hore moruo o tsoelepele ka hore ho be le litsela tse fihlellang khubung ea khoebo le litsing tsa litšebeletso. Moo re nanabetsang letsoho hore mokhoa oa ho tsamaea o phethahale ba bonolo, re leka kahohle hore maeto a joalo a phethoe ka polokeho ea basebelisi bohle ba tsela e leng baqhobi le litaaso.

Taba

Tahlehelo ea maphelo a litaaso nakong eo li tšelang likarolong tse ling tsa litsela tse kholo tsa Lesotho e bonahala e phahama ka sekhahla.

Ho fumanehile sesosa se seholo sa likotsi tsena e le ho khanna ka lebelo le phahameng hammoho le tlhokahalo ea thuto ea boipaballo 'mileng ho litaaso.

Boemo bona bo bonahala bo eja setsi kaha matsatsing a morao tjena baahi ba metse eo likotsi li hlahang ho tsona ba inkela molao matsohong ho haha limoto-moto ka mobu le ka majoe, tseo ka bo tsona li ka bakang kotsi ho basebelisi ba bang ba tsela.

Ho hlokomelehile hore metse e hola ka potlako haufi le litsela tse kholo tsa naha. Libaka tse neng li e na le baahi ba fokolang li bonahala li ntse li hola 'me lintlafatso li etsoa haufi le litsela. Lintlafatso tsena li bile li kenyeletsa le matlo a mothamahane. Sena se phahamisitse manane a litaaso tse sebelisang litsela libakeng tsena.

Tharollo

Joalo ka ha ho bontšitsoe hore sesosa se seholo sa likotsi tsa mebileng ke ho khanna ka lebelo le phahameng, e le ho netefatsa hore baqhobi ba theola lebelo haholo libakeng tse nang le litaaso tse ngata, Lekala le tla aha limoto-moto. Lekala le entse qeto ea ho aha limoto-moto libakeng tse hloahiloeng e le tsona tse bonahalang likotsi tse ngata tse amang maphelo a litaaso li eba ho tsona naha ka bophara. Ka lebaka lena, ho ntse ho ena le libaka tse ngata tse sa kenellang mokhahlelong oa limoto-moto tse tlo ahoa ha joale, 'me morero ke hore li tle li ahoe hamorao.

Morero ona o ne o le teng likhakanyong tsa lichelete tsa selemo sena, le hoja e ne e se ka sekahla se holimo, hang hoba re ithute tlhokahalo le molumo oa sechaba, re ile ra ikeletsa ho atamela Letlole la naha la Likoluo (National Disaster Fund).

Libaka tse hloahiloeng sebakeng sa khaho ea limoto-moto (identified hot spots)

1. White hill – Qacha’s Nek
2. Ha Sekake haufi le Hot line – Qacha’s Nek
3. Morija haufi le Roadside Filling Station – Maseru
4. Ha Moitšupeli lishopong – Maseru
5. Thaba-Bosiu - Maseru
6. Ha Leqele - Maseru
7. Haufi le MASOWE High School tseleng ea Kofi Annan-Maseru
8. Rural Khubetsoana - Maseru
9. Ha Foso - Berea
10. Lekokoaneng - Berea
11. Tsikoane – Leribe
12. Likalaneng - Maseru
13. St. Michael’s (Maliele) - Maseru

Mokhahlelo ona oa pele o khethiloe ho ipapisitsoe le libaka tse behang maphelo a sechaba tlokotsing.

Nako ea Morero

Khaho ea moto-moto oa pele e tla qala kahare ho libeke tse peli ho tloha joale.

Kea leboha!